

**Akileraruserinermik ingerlatsineq pillugu
Inatsisartut inatsisaata allanngortinneqarneranik
Inatsisartut inatsisissaat
(Nammineerluni nalunaarsuinissamut
piffissarititaasumik, kiisalu nunani allani
akilerartarnermi oqartussaasunut paasisutissanik
tunniussisarnerit pillugit ilisimatitsisussaataaneq,
taamatullu aningaaserivimmi kontumik
tunniussisussaataaneq aammalu
soraarnerussutisianut tunngasunik paasisutissanik
nalunaarsuineq pillugit allannguneq)**

§ 1

Akileraruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi, Inatsisartut inatsisaatigut nr. 12, 15. november 2007-imeersukkut aamma Inatsisartut inatsisaatigut nr. 2, 18. maj 2010-meersukkut kiisalu Inatsisartut inatsisaatigut nr. 9, 8. juni 2014-imeersukkut kingullermillu Inatsisartut inatsisaatigut nr. 8, 6. juni 2016-imeersukkut allanngortinneqartumi makku allannguutigittinneqassapput:

1. § 3, *imm. 3-mi* oqaaseqatigiit siulliit ima oqaasertaqassapput:

”Skatterådip ilaasortai allat arfinillit taakkualu tamarmik immikkut sinniisussaata SIK-p, AK-p, GE-p, NUSUKA-p, KNAPK-p aamma kommunit peqatigiillutik inassuteqareernerisigut Naalakkersuisunit toqqarneqartarput.”

2. § 16, *imm. 3* ima oqaasertaqassaaq:

”*Imm. 3.* Nammineerluni nalunaarsuiffik akileraruseriffimmut nassiunneqassaaq ukiumi ukiup aningaasarsiorfiup tulliani, kingusinnerpaamillu:

1) kinguliani nr. 2-mi 3-milu pineqanngitsuni tamatigut 1. maj:

2) namminersorluni inuussutissarsiummik ingerlataqartunit, akileraruseriffiup ilitsersuinera malillugu elektroniskiusumik nammineerluni nalunaarsuiffimmik nalunaarutiginnittut 15. maj,

3) piginneqatigiiffiit, peqatigiiffiit il.il., akileraruseriffiup ilitsersuinera malillugu elektroniskiusumik nammineerluni nalunaarsuiffimmik nalunaarutiginnittut 15. juni.

3. § 16, imm. 3-p kingorna imm. 4 nutaatut ilanngunneqassaaq:

"Imm. 4. Namminersorluni inuussutissarsiummik ingerlataqartut, piginneqatigiiffiit peqatigiiffillu imm. 3, nr. 2-mi 3-milu pineqartut, ukiup aningaasarsiorfiup siuliani akileraaruseriffimmit missingersuinikkut akileraarutissaminnik angissusiliiffigineqartut nammineerluni nalunaarsuiffimmik nassiussinissamut piffissaraat ulloq 1. maj."

Imm. 4-miit 6-imut matuma kingorna tassaalerput imm. 5-imiit 7-imut.

4. § 16, imm. 4-mi, imm. 5-inngortumi, oqaaseqatigiit aappaat ima oqaasertaqassaaq:

"Nammineerluni nalunaarsuiffimmik nassiussinissamik kinguartitsiniarluni qinnuteqaat tunngavilersugaassaaq, kingusinnerpaamillu ullormi nammineerluni nalunaarsuiffiup nassiunneqarfissaani tunniunneqarsimassalluni, tak. imm. 3-miit 4-mut."

5. § 30, imm. 1, nr. 3, atorunnaarsinneqarpoq.

§ 30, imm. 1, nr. 4-miit 6-imut tassaalerput § 30, imm. 1, nr. 3-miit 5-imut.

6. § 30-p kingornagut ilanngunneqassaaq:

"§ 30 a. Suliffeqarfutiminni kinaluunniit, Aningaasarsianit akileraarutit pillugit Inatsisartut inatsisaanni § 75, imm. 1-imi 2-milu taaneqartunik akissarsisitsisoq, sulisunut ataasiakkaanut tunngatillugu soraarnerussutisiaqarnissamut imaluunniit inuunermut sillimmasiinemik aaqqissuussinermut akiliutigineqartut ukiut tamaasa januarip qaammataa naatinngu tamakkerlugit nalunaarutigisassavaat. Tamatuma saniatigut akileraarutit A-t akiliutigineqartumit unerartinneqartut nalunaarutigineqassapput, akiliutigineqartoq soraarnerussutisiaqarnissamut imaluunniit inuunermut sillimmasiinemik aaqqissuussinermut tunngassuteqanngippat, Aningaasarsianit akileraarutit pillugit Inatsisartut inatsisaanni § 41, imm. 2 naapertorlugu sulisup aningaasarsiaanut akileraaruteqaataasussanut ilanngunneqartussaanngippata.

Imm. 2. § 30-mi, imm. 1, nr. 5 aamma 6-imi, kiisalu imm. 2-5-imi aalajangersakkanut aamma atuutissaaq."

7. § 34-p kingornagut ilanngunneqassaaq:

"§ 34 a. Akileraaruseriffiup paasissutissat § 30 a naapertorlugu nalunaarutigineqartut nalunaarsussavai.

Imm. 2. Inuup aningaasarsiaasa akileraaruteqaataasussat naatsorsorneranni akiliutiminik Danmarkimi, Savalimmiuni imaluunniit Kalaallit Nunaanni tamakkiisumik ilaannakuusumilluunniit ilanngaateqartinneqarsimannginnera uppersarsarneqarpat, inuup soraarnerussutisiaqarnissamut inuunermulluunniit sillimmasiinemik aaqqissuussinernut § 39 a, imm. 2-mi piumasaqaatinik naammassinnittunut akiliutai pillugit paasissutissat Akileraaruseriffiup qinnuigineqaruni nalunaarsorsinnaavai.

Imm. 3. Naalakkersuisut nalunaarsuiffik, matumani aamma qarasaasiat atorlugit nalunaaruteqartarneq pillugu, paasissutissanik nalunaarsorneqarsimasunik ingerlatitseqqittarneq il.il. pillugit maleruagassat sukumiinerusut aalajangersarsinnaavaat."

8. § 35a-mi imm. 7 aamma 8 nutaatut ilanngunneqassapput:

"Imm. 7. Inuk maleruagassat imm. 1 aamma 2 naapertorlugit atuutilersinneqarsimasut malillugit nalunaarutigineqartussaaq, paasissutissat isumannaatsuunissaat unioqqutinneqarpat pineqartoq pillugu paasissutissanut tunngatillugu ilisimatinneqassaaq, unioqqutsinerup inuk pi-neqartoq taassumaluunniit inuttut inuunera pillugu paasissutissat illersugaanerannik akornusiisinnaanera ilimanaateqarpat.

Imm. 8. Maleruagassat imm. 1 aamma 2 naapertorlugit atuutilersinneqarsimasut malillugit inuit nalunaarutigineqartussat, pineqartut pillugit paasissutissat maleruagassat imm. 1-imiit 6-imut naapertorlugit atuutilersinneqarsimasut malillugit katersorneqarlutillu ingerlateqqinneqarnissaat pillugu

tamaasa immikkut Aningaasaqarnikkut ingerlatsiviit nalunaaruteqartussaaitaasut ilisimatissavai, paasissutissanillu inunnut paasissutissat pillugit inatsimmi § 28 § 29-lu naapertorlugit pisinnaasaannik tamanik tunissallugit, taamaalilluni inuk paasissutissat illersorneqarnissaat pillugu pisinnaatitaaffini malillugit iliuuseqarnissamut naammattumik piffissaqaqqullugu, tamannalu tamatigut pisassaaq aningaasaqarnikkut ingerlatsiviup pineqartoq pil-lugu paasissutissanik akileraaruseriffimmut nalunaaruteqannginnerani.”

9. § 41 imm. 1-imi ”KANUKOKA” ”kommuninut” allanngorneqassaaq.

10. § 46-p kingorna ilanngunneqassaaq:

” § 46 a. Akileraarutaavallaartunik, ernianik, ajunngitsorsiassanik assigisaannilluunniit akiliinermit danskit koruuniinik, akileraartartup kontomut innersuussaanut aningaaserivimmiittumut pisarpoq. Taaneqartutut akileraartartoq nammineq nalunaarsuinikkut, utertoornissamut qinnuteqarnikkut imaluunniit kingusinnerusukkut kontomik innersuussisinnaavoq. Kontomut innersuunneqartumut akiliinermit akileraartarnermut ingerlatsivik akisussaasuujunnaartarpoq.

Imm. 2. Kontomik aningaaserivimmi Danmarkimi, Savalimmiuni imaluunniit Kalaallit Nunaanniinngitsumi innersuussisoqarsimappat, akiliinermit atatillugu aningaasartuutaanerusunik aningaasanit ilanngaasoqarsinnaavoq. Aningaasat nuutassat aningaasartuutinit ikinneruppata, akileraartarnermut ingerlatsiviup aningaasat kontomut innersuussamut ikinngitsuuinnarsinnaavai. Kontonut bankini Danmarkimiinngitsuni, Savalimmiuniinngitsuni imaluunniit Kalaallit Nunaanniinngitsuni akiliinerit piffissaq eqqorlugi akiliinertut isigineqartassapput, aamma tiguisussap nunami akiliinerit assigisaasa kinguneranniluunniit tigugaluarpagit, ulloq taanna kontonut Kalaallit Nunaanniittunut akiliinermit assiganik sullinneqarsimappata, taakkulu Kalaallit Nunaanniittut piffissaq eqqorlugi aningaasat tiguppatigit.

Imm. 3. Akileraartartoq siusinnerusukkut kontomik innersuussisimappat, akileraartarnermut ingerlatsiviup akileraartartumut nammineerluni nalunaarsuiffissakkut allakkakkulluunniit nalunaarutininik allanik nassiussamigut oqaatigisinnaavaa, akileraarutaavallaartut kontomut sumut ikineqassanersut, akileraartartoq kontomik allamik innersuussinngippat. Akileraartartoq kontomik allamik innersuussinngippat, nammineerluni nalunaarsuiffissami il.il. kontomut taaneqartumut ikineqassapput, tamatumuunalu akileraartarnermut ingerlatsivik akisussaafferutissalluni.

Imm. 4. Akileraartarnermut ingerlatsiviup akileraarutaavallaartut il.il. imm. 1-imi imaluunniit 2-mi taaneqartutut kontomut akilersinnaanngippagit, akileraartarnermut ingerlatsiviup ullormit akiliisinnaaffanit, akileraartartumut ernialersuisoqassanngilaq.

Imm. 5. Akileraartarnermut ingerlatsiviup akiliisussaafianit ukiut 5 qaangiuppata, akileraartarnermut ingerlatsivik imm. 1- 3-mi taaneqartutut kontomut sulii akiliisinnaanngippat, akileraartartup akileraarutaavallaartunik, ernianik, ajunngitsorsiassanik assigisaanilluunniit piumasaqarsinnaanini annaassavaa. Piumasaqaataasinnaasut uuma siuliani taaneqartut piumasaqaataasinnaajunnaartut Nunatta karsianut ikineqassapput.”

§ 2

Inatsisartut inatsisaat 2017-mi januaarip 1-ani atuutilerpoq.

Imm. 2. Inatsisartulli inatsisaanni § 1, nr. 5-imiit 7-imut ulloq 1. januar 2018-imi aatsaat atuutilissapput.

Namminersorlutik Oqartussat, 28. november 2016-mi.

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut